

四庫全書

集部

欽定四庫全書

集部

迪功集卷三

詳校官庶吉士^臣李如筠

中書^臣劉源溥覆勘

總校官編修^臣王燕緒

校對官主事^臣陳墉

謄錄監生^臣史光揚

欽定四庫全書

集部六

迪功集

別集類五

明

提要

臣等謹案迪功集六卷附談藝錄一卷明徐禎卿撰禎卿字昌穀吳縣人弘治乙丑進士官大理寺左寺副坐失囚降國子監博士卒年三十三平生論詩宗旨見於談藝錄及與李夢陽第一書如云古詩三百可以博其源

遺篇十九可以約其趣樂府雄高可以厲其
氣離騷深永可以裨其思然後法經而植旨
繩古以崇辭或未盡臻其奧吾亦罕見其失
也又云繩漢之武其流也猶至於魏宗晉之
體其弊也不可以悉據其所談仍北地摹古
之門逕特夢陽才雄而氣猛故枵張其詞禎
卿慮澹而思深故密運以意當時不能與夢
陽爭先日久論定亦不與夢陽俱廢蓋以此

也王士禎稱黃庭堅自定其詩為精華錄僅
三百首禎卿自定迪功集亦三百首此本凡
樂府四十四首贈答詩十六首遊覽詩二十
五首送別詩四十首寄憶詩二十一首詠懷
詩十二首題詠詩二十一首哀挽詩三首共
一百八十二首不足三百之數而五卷以下
則為雜文二十四篇題正德庚辰刊前有李
夢陽所作序亦稱六卷當是原本不知何以

與士禎所言不符豈士禎所見別有一本歟
乾隆四十六年十月恭校上

總纂官臣紀昀臣陸錫熊臣孫士毅

總校官臣陸費墀

迪功集原序

徐迪功集六卷并談藝錄子容寄我豫章予即豫章刊
焉印傳同好意表迪功文云初迪功亡京師也予在梁
子容訃予曰昌穀遺言子序其遺文於是手其文歛歛
久之曰嗟乎予忍序吾友文耶麟鳳芝寶世所希邁見
邁見之而遽天滅亡也天生之故奪之邪抑生不生生
而脩或短非天所諳哉迪功以文賦起吳中十數年間驚
翔而虎變彬彬乎出人士前矣然竟轍軻天滅亡也凡

此天果弗諧之邪乃予觀李唐人李杜軾軻勅賀則天
未始不憐才流涕也然猶異代足寬解孰謂親遘見之
如迪功者云客曰氣積久斯滴三代以後聖人罕生孔
子以周末故不得位觀其大可占其細若是則魏徵將
為鬼魅之說非邪客曰羣體迪功奚以之也予曰談藝
錄備矣夫追古者未有不先其體者也然守而未化故
蹊徑存焉雖然辭榮而耽寂浮雲富貴慷慨俯仰迪功
所造詣予莫之竟究矣今詳其文溫雅以發情微婉以

諷事與暢以達其氣比興以則其義蒼古以蓄其詞議
擬以一其格悲鳴以泄不平參伍以錯其變該物理人
道之懿闡幽剔與紀記名實即有蹊徑厥儷鮮已修短
細大又曷論焉不載迪功履歷以別有志述北郡李夢
陽序

欽定四庫全書

迪功集卷一

明 徐禎卿 撰

樂府五十首

樂舞歌辭

靈芝華華洞房鳳凰儀儀九章生逢盛世聖祚長陛下
承基人悅康鼓玄瑟吹鳳簧八音翕合而鏘鏘坐者忘
疲聽者哀以傷且為樂壽萬年何用怵惕懷虞殃主獻
前致辭賓酬跪奉觴命如晨風葉倏忽聚散允無常及

時秉燭遊日月不我將鷄號旦旦鶴鳴瀼瀼諸君慎勿
離席而東西具我粗飢進糝羹日團團升扶桑次衡陽
倒君衣服君裳考鐘擊鼓會明堂日之方中朝既昌蠻
夷率舞鳥獸攸行陛下黃耆福履無疆

閭闔行

閭闔開道顯通今時當太平鷄鳴狗吠相聞於國中民
生苦不樂朝作暮不春生何以樂時哉雍豪右不貸法
郡縣吏愛農徭賦壹稼穡穰兵訟以息民無天凶黃河

水清出龜龍願我皇帝壽與天侔無終窮

遊俠篇

四牡服朱軒俠氣何翩翩夕驚邯鄲道朝馳函谷關
千金飾冠劍寶服芳且鮮徒御若雲浮周道直如弦
堂中養死士被服皆珠紈櫪馬厭梁肉貝甲委如山
片言傾五嶽萬乘慕其賢諸侯奉白璧為壽卮酒前
合從連趙魏駕轂出齊燕仗劍歸質子矯節奪兵權
皦皦日中議歟血重一言鷄鳴脫虎口狗盜乃獲全
天地相盪蝕四

海如沸淵憑軾一抵掌解紛談笑間縱橫負奇節逸氣
蓋八埏慨慷功名會何言七尺捐策勲山河溢流光竹
帛鐫何為坎壈士撫劍獨長歎

猛虎行

上山晨採樵下山逢猛虎深林叢薄不可度熊羆巉巖
兮向我怒虎欲食我低頭據地而長號使我心悲淚如
雨舍中無人言父與妻繫下又無食使我孤兒啼拔劍
前致詞爾胡不仁至此為稜牙鋸齒食人之肝拒骨而

撐屍膏血布川谷鳥銜其肉倒挂東南枝惻惻草野中
行哭聲正悲嬌女行採桑道逢野虎搏食之倉浪之天
更不慈猛虎瞑目若搖思便復舍我置道傍我欲東歸
河無梁綿綿邈邈思我故鄉嗟爾行路人猛虎當關慎
莫行思我父母多苦辛吁嗟猛虎白額狸斑而黑文何
不渡河而去從彼豺狼羣城中咆哮竟夕聞吾將訴汝
於泰山君猛虎行且莫歌泰山之君奈若何

苦寒行

凜凜朔風運悠悠玄象馳北鄙何蕭條漠野恒淒其崇
霜依岫結峨冰憑岸滋飛沙塞門黃代馬厲長悲漂漂
密雪興飄飄繁雲垂窮獸啼原澤飢烏號樹枝無衣嘆
秦風卒歲咏幽詩伊余炎荒士飄颻寄邊陲風土有本
性孤貉非所宜飲漿豈執熱懷續猶抱絺處燥常畏瘍
思涼誠惡痺寄謝父與母游子難久居

榆臺行

按榆臺戰在
弘治乙丑年

榆臺高以臨匈奴之罪當夷戰不利師被圍師被

園士無糧渴無漿拔劍仰天訣壯士餓死亡棄尸不保
蹂藉道傍嗟爾從軍之人行不來歸奈之何心傷悲

白紵歌四首

三星爍爍花滿堂素腕盈盈出洞房垂羅映縠耀明妝
皦若雲中開月光流情盼君君莫忘停歌節舞進玉觴
願君安坐夜未央

中庭桃枝連理傾瓊卮含霞玉醴盈歌舞君前流目成
絲桐順耳感人情持觴把袂君不違願作梁間雙燕飛

旨酒千壺列東廂美人如花嬌北堂齊歌合舞聖世昌
願得歡娛永未央脂車秣馬且踟躕百年之會忽須臾
東流之水西飛鳥今我不樂何為乎

魚瓊膏擊素鮮金弁我我賓四筵趙瑟高張調蜀絃長
袖翩翩陵七盤華歌妙舞及春妍蘭苕參差桃欲然上
天明明降醴泉皇帝陛下壽萬年

步出夏門行

遠游躡泰嶠高舉凌雲門白日駐華蓋丹霞耀飛軒騰

蛇載霧興玄鶴憑飈騫玉女從白鹿青龍扶兩轅左顧
叔卿笑右接洪崖言長松蔭列坐六博遡芳樽嫋嫋祥
風被郁郁華芝磨沐余逝咸池晞髮乘崑崙輕身倣鴻舉
長嘯若雲翻下視塵世徒鼠腐寧足論

鷓鴣行

白鷓捉黃雀斜盤下九天豈知南山側復有虞人弦一
發中雙翼忽斃青雲端行人皆撫掌仰視落飛翰弓矢
懸馬頭少年坐雕鞍將歸咸陽市百鳥爭聚觀美酒白

玉缸肉腊黃金槃樂哉今日宴四座俱萬年

元會曲

蒼木肇皇紀朱光熙泰元明堂八軌湊洛邑四方尊河
山週武衛表裏殿師藩鏞鼓天上合冠蓋日中屯玉帳
雲龍會南山椒栢樽穆清乾極拱優渥奉華恩慚非白
獸客虛承象魏言

將進酒

將進酒乘大白磈礫為罌錦作罍燕京杜康字琥珀朱

絡三千酒一石君呼六博我當擲盤中好采顏如花駕
鶩分翅真可誇壺邊小姬拔漢幟壯士失色從喧譁拉
君髯勸君酒人間得失那復有男兒運命未亨嘉張良
空槌博浪沙秦皇按劍搜草澤豎子來為下邳客一朝
崛起佐沛公身騎蒼龍被赤舄滅秦蹙項在掌間始知
橋邊老人是黃石狂風吹沙黑漲天天山雪片落酒筵
錦屏繡幙不覺暖齊謳趙舞繞膝前人生遇酒且快飲
當場為樂須少年何用窘束坐自煎陽春豈發斷蓬草

白日不照黃壚泉君不見劉伶好酒無日醒幕天席地
身冥冥其妻勸止之舉觴向天白婦人之言不足聽又
不見漢朝公孫稱鉅公脫粟不舂為固窮規行矩步自
銜世不若為蟲處禪中丈夫所貴豈窮若干載倜儻流
英風人言徐卿是痴兒袖中吳鉤何用為長安市上歌
擊筑坐客知誰高漸離我醉且倒黃金壘世人笑我鋪
糟而揚醅吁嗟屈原何清漁父何卑魯連乃蹈東海死
梅福脫帽青門枝明朝走馬報讎去襄子橋邊人豈知

江南樂八首代內作

生長在江南不愛江北住家在閭門西門垂雙柳樹
陽春二月時桃李花參差寄言諸姊妹莫遣惡風吹
還鄉信自樂望近轉於邑阿母見兒歸定自持儂泣
野鳬生雛時乃在河沚中可憐生羽翼各自戀菰叢
橘生江上洲過江化為枳情性本非殊風土不相似
人言江南薄江南信自樂采桑作蠶絲羅綺任儂著
與郎計水程三月定到家庭中赤芍藥爛漫齊作花

江南道里長荆襄在何處聞郎昨夜語五月瀟湘去

隴頭流水歌三疊代內作

隴水鳴咽流各自東西下生男不下堂生女棄中野
下隴磨剪刀刀澁指爪柔將刀斷割水那用東西流
隴水鳴不止似聞阿兒語出門不見人肝腸斷絕汝

王昭君

金裝嬌玉驄結束事和戎獨去白龍道遙將黃鵠同紫
臺留漢月青塚落邊風萬里琵琶曲流悲入漢宮

從軍行五首

獵火照燕然匈奴寇朔邊昨夜飛符至將軍出酒泉魚
麗天陣合孤塞伏兵連一鼓旄頭落長驅捉左賢橫行
黑山外凱入武威川萬古清沙漠常令無塞烟

貳師將軍初出師橫行十萬羽林兒隔河追斬呼韓將
烏壘高懸太白旗

五壘神兵下玉門倒傾西海蹴崑崙輕車夜渡交河水
斬首先傳吐谷渾

調笑名王坐玉鞍
蛇矛丈八奮如湍
天子戎衣遙按劍
將軍直為斬樓蘭

青天磧路挂金微
明月洮河樹影稀
白鴈哀鳴飛不度
黃雲戍卒幾時歸

結客少年場行

驪馬牽青絲
閭里爭耀馳
朝游吳姬肆
暮入屠沽兒
袖中挾匕首
跨下黃金鉞
然諾杯酒間
泰山心不移
東市殺怨吏
西市仆讎尸
裂眦白日變
英風拉如摧
突過銅

龍門電影忽如遺
司隸徒斂手行人莫敢窺
橫行三輔間法令不得施
壯義冠千古雄聲流四垂

少年行

生長在邊城騎射有聲名
召募河源去長屯都護營
登山望敵氣間道出奇兵
十決推雄戰連呼拔虎旌
雲中息刁斗天上掃欃槍
坐弄胡笳月梅花隴水清

平陵東行

共工觸天補女媧
后羿射之摧九烏
君不見泰山之高

屹天柱有時東崩海水枯秦人築長城西筭羌戎北匈奴
開闔地戶天下樞九關虎豹下食人鬪騾飛血昏風
塵四海望之威天神亦有荆軻起報讎裂眦向天天為
愁拔劍一呼走萬乘快哉壯士誰與儔儒生抗眉論堯
舜斂手待烹良可羞上卿執珪古所侈魯生棄之若敝
屣鴻毛輕死為二桃笑殺田疆與冶子龍蛇消息各有
時白石落落入豈知季布髡為奴范睢乃是糞下兒一
朝雲雷起屯厄揮刃脫縛揚高眉我今偃倮困螻蟻吹

沙吸呷若鮒鯉牛泔蠕蠕豈足活河伯向我誇秋水夜
夢憑雲忽上天傾山倒海作龍淵天門中開繞赤電霓
旌雷車導我前空山颯颯走霹靂草木摧拉飛炎烟丈
夫未足哀困窮仰嘆白日回英風不能鼓行青海上亦
當擊劒於咸陽之市中寧學鉏麇觸槐死羞言投閣仕
莽公吾悲夫二子之死也誠如寒蚓之與秋蓬

長安曲

玉館瓊臺接紫微長安甲第有光輝夜夜錦燈車馬散

平陽歌舞月中歸

燕京四時歌

春

天柳垂絲拂建章
銀冰千片落金塘
烟花萬國行人度
遙指蓬萊春日光

夏

暑殿金泉枕碧山
清涼樓閣五臺間
赤日不行葱嶺北
雪花長繞玉門關

秋

薊門桑葉落滹沱代北浮雲鴻鴈多莫向雲中傳尺素
空將明月對嘶蛾

冬

葡萄新酒潑流霞十月燕山雪作花天子後庭誇玉樹
昭君紫塞拂琵琶

擬古宮詞七首

君王無事日臨戎
韞韞親調白玉弓
千騎紅袍齊扈蹕

臂鷹遙出建章宮

千場搏戲未言回
魚鑰重重向暮開
遙聽雲中催羯鼓
君王何處打毬來

劍舞戎歌樂未休
煌煌芝火五城樓
班姬獨卧昭陽殿
卻捲珠簾望女牛

十五承恩侍袞旒
宮中初拜大長秋
見說上林陪羽獵
君王同著紫雲裘

興慶池頭漏未闌
梨園弟子曲將殘
花前更進涼州伎

無那西宮月色寒

馳道毵毵御柳垂春風挾彈羽林兒武皇親御長楊殿
勅與龍駒控鬣騎

狗監離宮承宴歡掖庭通晚不迴鑾那能夜夜長門裏
銀燭薰衣待漏殘

雜謠四首

按此皆紀正德五年八月之變也

夫為虜妻為囚少婦出門走道逢爺孃不敢收東市街
西市街黃符下使者來狗棘棘鷄鳴飛上屋風吹門前

草肅肅

壞我民居田樹子桐與櫟桐櫟何青青素車不得下
狐彭彭兔逐逐反顧奔以北彎弓來彎弓來

召我乎逵兮築子之棲兮木槿隕落巢安歸兮

迪功集卷一

欽定四庫全書

迪功集卷二

明 徐禎卿 撰

贈答一十八首

學謝靈運賦華子崗詩贈趙建昌

朱巒蔚靈輿雲海互盤旋
陰霞絢石室夾篠蔽清漣
翠羽紛啁哳瓊藥合芬妍
桂嶺屯蒼靄桃蹊迷紫烟
朝登郡樓望佳氣鬱蔥芊
挹景企嘉客臨風懷羽仙
冥賞非偶愜神理
豈虛傳建德寡民務
山水發清絃順性奚矯

迹知道在忘筌非君秉淵尚茲理誰為宣

訓贈方周二子

弱弄寄觚翰中歲慕沈玄浮章粲華圓精理密真詮
弘述允大道忘言亦自然常恐良時暮蘭苕豈久鮮游
情倦素藝委志脫玄蟬流觀宇宙內尚友羲皇前方生
振文綺周子攬冥筌清論激秋水溫藻發春泉跂予慕
二美猗子企前賢乃愜同棲志忽枉瑤華篇氣感聲必
合跡異理無愆永保日新願均期善自全

寄壽前冢宰王公三十韻

乾化昭於穆
災明決世仁
涵濡存一德
履載表英臣
伊昔稱專柄
公才獨邁倫
沛霖孚碩望
柱石秉鴻鈞
補袞山明火
為賢甫及申
真能壽元氣
何啻觸龍鱗
苦節深盤錯
孤心契靖寅
蒼生多起涸
時俊總依塵
利澤江河運
威靈泰華峯
台衡惟直道
社稷一微身
歲序成功去
林泉此志伸
人心思几杖
吾道卷經綸
皓首歌淇澳
青雲絕渭濱
中軍傳午子
綠野蔭霜筠
繫國安危舊
逢時

繼易新培生賴天地屬望在庭宸存問王言渥玄纁禮
數頻高星臨寵使窮谷播陽春慶舞狂童穉詞章湧縉
紳優游不知耄弘天忽茲辰箕子推洪範莊周記大椿
形骸全矍鑠學術愈精純梁木咸傾伏元龜識泰屯已
能回眷注還擬下蒲輪愚也東南士叨為髫髻民甘棠
徒自倚品藻託無因諫草占心赤丹青得貌真山中煉
金石霞外隱麒麟漢相久辟穀應侯長謝秦悠哉瞻佇
迴北斗挂天津

古意二首贈劉子

空為郢中客不見郢中吟美人高堂上自奏山水音帝
子莫何處瀟湘雲正深寂寥誰共賞江上獨傷心
楚妃一失寵獨宿楚江陰雖念容華落終憐繾綣心聞
說章臺畔游歡自淫今日宮中事不言讒妬深

贈錢元抑

錢郎毛髮鬢且懸秀骨挿鬢蒼厓開驂騑黯黯有奇
氣一蹴萬里空長埃今之畫工不可數畫馬無過曹韓

武吳生落魄筆有神不求貌馬求貌人英物由來豈殊
相麟鳳聖賢俱絕倫却恨丹青損真趣獨事玄毫拂紈
素生象蠕蠕指間出大巧無乃遭神怒故人三歲不相
見開圖忽訝錢郎面小兒八歲快目睛問之嗟然呼姓
名嗚呼畫馬雖工只畫形風雲道路俱冥冥豈知錢郎
貌如此馮馮大腹儲滄溟高蹄昔蹶未可輕今日近前
凡馬驚吳江之湄浙之渚我行於南從此始掉頭不見
眼中人寂寞行歌向湘水

贈張注先生

蚤得投簪理緬欽遺俗情丘園白日靜眉宇紫芝明上
德綏多杜賢孫復令名道全身愈泰慮澹物俱輕壽酒
山人勸柴車縣尹迎坐臨沖逸境於此學無生

靈隱寺贈靜公

聞有千年寺長松信許深沖虛半樓閣落日更登臨舟
楫窗中小藤蘿天際陰江流明暮靄石澗響空林蟠據
雄都會風烟異古今幽真余有慕詩義爾能尋雲翼無

言健淵魚本自沈終期白蓮社來就玉山岑

答沈休翁所問因成贈章

六齡識姓字十歲弄歌章十二失慈母嬉戲道路傍十
七學干祿跣跑空傍徨幸逢黃河清昭映白日光聖心
勤草萊姦逐雲羅翔謬以跌宕資寘之枳棘場雖有魯
連節濩落無所將揣摩笑蘇秦況乃章句行不見樊籠
羽冥心在八荒飄颻碧雲緒夢寐嵩山陽飲水心自足
懷哉桂樹芳竭來荆巫渚傲然稱楚狂夫子挺喬嶽時

人呼鳳凰一隱不世見鄰父徒窺牆而我愛逸調談笑
登其堂永符金龜契豁以歲年忘予今入衡山訪道躡
飛梁倘遇洪崖子遥傳紫汞方與君變白髮攜手共徜徉

王敬止御史始竄海南繼移永嘉令自燕中迎
養

珠厓昔長竄連州始量移借問東甌土何如南海湄霞
標建台嶽桃源帶武夷鴈山榮桂樹象浦合珠漪玉璫

非一族海錯被珍奇金盤湛碧露

酒名

黃柑滿綠枝歡此

三春日復愜暮秋時鳴琴坐高館撫景臨華池迎輿侍
潘令進酒舞萊兒願以今時笑還瞻昔朝離豐澤亨雷
雨瑶草變芳蕤永嘉多懋宰建德易絃絲昔慕文翁化
永嘉有聲

文宗儒昔宰
永嘉有聲

今蒙葉尹慈長沙非舊謫宣室契前思光

華冀一接胡越詎能追河東欲有獻及此汾陰祠

對雪贈客

雜絮下瑤霙飛滿洛陽城仙人深雪裏獨戴鹿皮行高

卧思安道攜琴就阮生竹林陪素蟻兔苑玩流英誰言
劉水棹今日在瑤京

酬邊太常於燕山見憶之作

故人惠思我百里寄瑤音獨在山中宿松齋清道心霜
鐘流夜壑曲澗入幽深寂寞悲千古橋陵梓橡深

石川子歌

石川子隱於魯門之西長牽青牛飲素溪有時駕之騂
文狸騂丈狸乃至岱宗之巔弱水之湄石門迢迢上通

天玉京金闕光陸離過謁太山君道逢赤松師授以長
生說鍊氣服食除三尸青泥丹鼎子善治玉杵他日如
相贈共爾商山歌紫芝

贈王淵之

并序

淵之故游獲落廿年頃來京師將從卑宦霜霰被
鬢風塵改容飲以卮酒并為歌以贈之

君不見十月狂風吹白雪長安城中地欲裂朱門酒爐
紅災天空裏瓊花旋消滅由來都國盛繁華青雲絡繹

滿仙車浪說黃金賜寒士爭言白璧謁侯家
驕矜意氣遙相羨片善朝推蒙夕薦待詔虛沈金馬門
傳宣直上麒麟殿王郎獲落爾何求千里乘驢被黑裘
空論作賦稱才子未肯低眉事貴游知君不得逢楊意
終愧明時老督郵

答顧郎中華玉

昔居長安西今居長安北蓬門卧病秋潦繁十日不出
生荆棘牽泥匍匐入學宮馬瘦翻愁足無力慵踈頗被

諸生譏虛名何用時人識京師賣文賤於土飢腸不救
齋鹽食去年作吏在法曹月俸送官空署職牀頭一甕
不滿儲囊裏無錢作沽直歸來困頓不得醉兒女荒涼
婦嘆息今年調官去懊惱苦笑先生祿太嗇釜中粟少
作糜薄白碗盛來映膚色丈夫但免溝壑辱日飲藜羹
勝羊肉平生富貴亦何有羸軀幸自弛耕牧但願時豐
民物安官府清廉盜賊伏人歌鼓腹厭梁菽先生雖病
甘苜蓿一朝雷雨濯亨衢坐見諸公執中軸先生脩然

卷懷退茹齋歸向南山卜

各賦隱士得魏仲先贈金陵顧徵士

何處蓬山宅汾陰傍漢宮
冥棲紫芝客長嘯綠雲中
忽佇甘泉駕遙尋河上公
玄風那可掇大道本難窮
夫子金陵隱心將靜者同
瓊枝無以獻歌此寄喬嵩

答獻吉

花發平章宅鶯啼省樹春
殷勤花鳥意愁殺獨游人

王員外不解叅同契但索一詩許以遺我率爾

戲之

王烈持洞章茫然不能讀石氣銷紫煙十年秘空麓從
來楚史識三墳阮籍焉能辨赤文一自華陽窺妙訣緱
山夜夜鶴相聞

游覽二十五首

入沛

落日徧草色游子入沛鄉如何緬茲土能令心慨慷道
逢守津吏問客來何方一為陳風俗三歎久徬徨前者

貳尹家會客具酒漿遣吏出市物吏私入已囊尹訊卑
以紆吏言伉以張回身赴入河尹懾親扶將矯矯驚悍
風重忿復輕亡由來英雄氣儻盪出芒碭余聽此言立
側想大風章撫劒一為歌春宇無精光原野厲長飈飛
鳥不遑翔瞿瞿蟋蟀歎悽惻感陶唐

謁嚴子陵祠

言訪羊裘隱荒臺迹宛然嚴崖祠屋綴天漢客星懸伊
昔風雲感丘園束帛幾神龍不可係造化獨深全去矣

孤蹤邈懷哉大澤偏釣竿何嫋嫋石瀨故濺濺郡以高
名著山依汗簡傳餘風猶激懦聖代更招賢圭組誰憐
辱襟期本尚玄終焉赴空谷寤寐白駒篇

彭蠡

茫茫彭蠡口隱隱鄱陽岑地湧三辰動江連九派深揚
舲武昌客興發豫章吟不見垂綸叟煙波空我心

與江夏尹餞于舍人于黃鶴樓

未有干戈地能令棟宇全乾坤餘壯觀荆楚鬱山川鶴

唳寥天迴江深禹廟前舟檣控南北節鎮此旬宣令尹
乘時暇使君同祖筵炎蒸飄不到虛爽境何偏乃繼登
臨迹空懷作者賢風煙一回首今古共淒然握手將安
適經秋未擬旋迨迨沙際月遙憶桂陽船

在武昌作

洞庭木葉下瀟湘秋欲生高齋今夜雨獨卧武昌城重
以桑梓念淒其江漢情不知天外鴈何事樂南征

廬山

豫章山水郡廬嶽此深蟠吳楚開雄鎮東南表巨觀中
天浮黛色百里曖晴巒漸近雲消豁俄驚勢鬱盤錦屏
圍合沓玉笋屢叢攢詰曲群形變登臨萬象寬風高六
月電氣慄九江寒石鏡明花外香爐出霧端劍芒遙矗
矗龍脈故丸丸瑶草幽難掇青蓮秀可餐赤城虛瀑布
彭蠡更波瀾禹跡於茲盛崇功振古刊壯懷凌絕頂倦
鳥息飛翰霄漢心何有沈冥性所歡將脩梵門術欲上
羽人壇淨社花垂白名巖竈覆丹昔賢非不達於道自

相安愛勝真忘返遺榮亦未難聊須偃松竹遂可掛纓
冠祗為懷佳侶淹留獨寤歎

江上逢許員外

杖策下天門揚帆楚江水長風吹客心倏忽墮千里千
里何青青離家幾日春忽逢天上使云是故鄉人褰帷
一共笑宛爾平生親聞子金陵來衣滿厯陽塵握手起
情慰依依多所陳君家石橋下與我十室鄰海內各分
散白頭常若新葉散根株連諧合固有因由來吾黨士

多作帝鄉臣况爾發靈裔吳山傳秀神感此不見遺肯
與凡礫倫邂逅一草草馳驅還苦辛君發李陽河予留
貴池口脈脈兩情遙胡寧棄我後昨日到同安青山待
余久解我碧雲裘長松掛虛牖雙童進草飯遇我情彌
厚庭中好鳥聲嚶嚶自求友春風吹綠楊十日慙分手
予今發武昌早晚下瀟湘仙人黃鶴樓待子洗壺觴君
乘山公馬訪俗過蘄陽還呼黃鶴仙醉舞雙徊翔八月
涼風發君言及豫章三春煙景暮余定達吳閭男兒衣

錦貴那不歸故鄉為君邀族人出郭具壺漿徑須愁痛
飲別後莫相忘

曉下廬山

下山鼯鼠啼藤竹使人迷多謝東林月殷勤過虎溪

登支硎山樓遲游侶

谷寺憐幽密茲樓表麗觀煙雲塞壑動竹樹入門寒獨
往迷前徑憑高遲所歡時聞有清磬遙出暮林端

登半塘寺閣

夙有山水慕苦為形役拘澹茲夏日永聊得狎浮圖攀
雲凌廣閣靄靄見吳都諸川散林上平野鬱芬敷法花
垂縹緲晴采動虛無煙火下方雜昏明時態殊境超自
生樂疲心忽重蘇因傷人世子擾擾即長途

曉思

月落晨渚前鷄舞春檣側榜人起蓬垢折薪候炊食踈
樹發東光熠熠汎水色關吏始通津起柁指鄉域攬衾
渺余望垂鬢深不測浩歌忽以仰夷猶羨雙翼

吳舍人園亭

新年風景地休沐竹林人魚藻含泉動楊園聽鳥新夕
陰連九陌喬木俯千鄰虛負高陽興多慚酩酊身

長陵西望泰陵二首

新宮猶藹藹白露已蒼蒼詎識神靈遠徒悲劒舄藏陰
風振大漠落日照漁陽稽首攀松柏雲天灑淚長
昔送宮車出長悲西雍門今來寒食節獨望灞陵園杳
杳仙城閉萋萋封樹繁當時侍從客慟哭幾人存

九日遊眺三絕句

頻年搖落寄邊州，無賴今晨強出遊。
從教烏帽欺人髮，不耐黃花亂客愁。

北來隴野太蕭條，旅客登臨思易消。
天入燕關真自迴，雲開碣石未為遙。

西門沙丘頽欲崩，思望芒山強自登。
正愁隴樹模糊甚，更著浮雲蔽泰陵。

秋日過故尚書吳公池館二首

平泉舊時里秋日水亭開苑樹澗陰合魚梁山照來野
人臨逸釣公子進新醕興盡何須謝垂鞭醉即回
不見尚書履階陰空綠苔菊荒三徑在棗熟衆禽來跡
為憐幽駐圖因好事開秋風懸劍處落日肯重回

晚過獻吉齋所

端居聞子肅清修吏散鴉啼省署幽芳草不知人獨往
空山何意鳥相求開軒歷歷明星夕隱几蕭蕭古木秋
自昔風塵堪吏隱浮生莫遣有離憂

嘉禾道中

槁李城何在蕭條草樹存
未醒吳苑酒已動越鄉魂
問水來天目看桑過石門
愁聞鵲鴝語寧聽楚山猿

浙江驛下作

自嘆南浮客崎嶇驛嶺遙
川途澹斜日鉦鼓遠揚橈
水勢含滄海山形折落潮
夷墟不可問徒使旅心搖

舟懷

天曠多樹林日赤溪路永
我行一何勞窈窕沂川嶺
湍

流好石關沙磔與舟鯁行行指前栖望望不得逞火雲
漸暖滅蟬鳥空山靜奄忽青松間了了掛圓景一與幽
賞遇遂使煩慮屏先書謝廬僧為掃香爐頂

過梨雲精舍

遠師耽宴寂趺坐石牀深留客開香積談玄就竹林煙
藤結暝翠雲磬下空音淨現青蓮色懸知出世心

漢陽逢故人

銀鞍白馬渡江來江上相逢一笑回若道漢江無咫尺

思心何事日悠哉

迪功集卷二

欽定四庫全書

迪功集卷三

明 徐禎卿 撰

送別四十首

送友二首

瓜生葛薪下緣蔓義相因人生交結故婉孌自諧親交
義諒不遠戚若同株根勿采棘下瓜棘傷多苦辛不惜
傷者苦但恐株莖分念當與子別惻惻傷我神

靡靡客行役曖曖歲云晏問子豈不勞言適故鄉縣送

子不得遠我悲一以惋借問何所悲桑梓不可見塞裳
陟高隴白日忽已暝飛鳥東西翔我思一以亂低頭念
父母涕下忽如霰

留別邊子

我車駕言邁將子城之隅豈無他人親嫜嬾心自知握
手一為嘆忽忽從此辭驅車何迢迢迢迢復遲遲匪我
車輪遲行子有所思登高望河水河水何瀾瀾褰裳欲
涉之俛首以踟躕孤楊生河干嫋嫋何差差民生失儔

匹惻爾令心悲

留別都城諸同志二首

對酒忽不樂，悵然懷別離。
別離結中勞，眷彼長路歧。
苒苒郊河樹，曖曖關門祠。
佇望瀟湘水，先與秋風期。
鴻鴈雲中來，噉噉使人悲。
懷哉爾方集，悵矣予當辭。

客有悽悽者，三年歌式微。
竭來事原隰，經返舊園扉。
昔往被冬裘，今還服春衣。
撫景雖云愜，中歡惜以違。
出門見芳草，念子忽如饑。

送邊子出剌衛輝五首

平生歡愛日履坦昧前艱及爾嚴霜集方知末路難疇
昔同棲翮毛羽各摧殘顧影惟爾我慼慼傷心肝

心肝義所均離索一何深雖厯同朝寺雲路邈飛沈君
處承明陽我居湖水陰淹閣嬰多瘁日夕遲爾音

爾音良不違胡為繫我思何況當乖絕飄飄各異枝欸
曲杯酒言果諧符守期努力茂時猷聊以慰我私

我私何悠悠薄送遵垌丘翔野曠無人樹木鳴颼颼登

高望衛邑思見漕衛流前景奄忽匿浮雲蔽行輶
行輶道已繇下車歲聿遷藹藹朝歌邑閭里翳人煙慷
慨倚昔風緩疾在更絃寄謝當途子成暮庶來還

送士選侍御

壯士樂長征門前邊馬鳴春風三月柳吹暗大同城盧
溝橋下東流水故人一樽情未已遙天飛盡隴頭雲唯
見居庸暮山紫羨君鞍馬速流星予亦孤帆下洞庭塞
北荆南心萬里佩刀長揖向都亭

送范靜之遷威州五首

吾憐范巨卿，悃悃不邀名。
作吏竹林下，清風訟獄平。
與君同得罪，獨竄夜郎城。
萬里巴江水，相思猿狖鳴。

聞上巴江峽，黃牛峽最遲。
君聽流水意，何似隴頭悲。
爾向巫山日，瞿塘春可憐。
柳絲嬌綠水，白雪媚陽天。
玉壘為糟蘖，巴川即酒泉。
乘舟捉明月，直到女牛邊。
爾作南遷客，余同北地囚。
酣歌易水動，舞劍白虹流。

送徐生之金陵

為慕金門來竊窺三年執戟力云疲著書每憶東山好
蘿月冥冥空紫芝吾宗羯子清狂甚笑拂扁舟向我辭
清夜誰同牛渚泛早時聞詠女郎詩天外涼風吹不絕
餘音長繞鳳凰池

送許補之還丹徒

憐君揮手去匹馬向南天旅病青山外鄉心落日懸燕
關變積雪淮柳動新烟驛路重雲裏相思易隔年

送王誕敷之官長沙

美人南往雲陽墟我欲從之道鬱紆晝夢衡峯半空紫
覺來失卻巴陵湖對君把酒心茫然七十二峯猶眼前
玄猿攀蘿石壁仄黃鶴空洲芳草連春寒風多太陰黑
瀟湘淋漓濕雲色楚宮花木啼杜鵑舟子商人淚橫臆
君欲去兮可奈何側知王事難蹉跎離心不惜瑤華贈
聊為湘纍誦九歌

送蕭若愚

送君南下巴渝深予亦迢迢湘水心前路不知何地別

千山萬壑暮猿吟

送周夢良令臨朐

官橋一壺酒來送穆陵人去住同為客風煙各損神征
途殘臘盡到日柳條新要自酬知己寸心寧復陳

送耿晦之守湖州

遠下吳江向雪川
高秋風物倍澄鮮
鷓鴣菰葉翠相亂
錦石游鱗清可憐
郵渚撾頻津吏鼓
漁歌唱近使君船
吳興峴山足勝事
漢水襄陽空昔賢

青門歌送吳郎

吳郎醉嗜長安酒，落魄自言為客久。
走馬頻看上苑花，回鞭幾折青門柳。
青門瞳瞳魚鱗開，乳燕游絲相逐來。
柳下雕鞍留別袂，花間酒盞覆蒼苔。
浮雲去去辭城闕，芳草連天那可歇。
野店春風聽早鶯，關河曉樹懸新月。
千里淮流雙畫橈，廣陵驛前逢暮潮。
落日帆歸揚子渡，青山家對伯通橋。
吾家流水元非隔，宛轉胥臺通巷陌。
草長難尋仲蔚居，林深不見陶潛宅。
清溪屋下可垂綸。

復有萼羹足獻親君歸倘食冰絲鱠為念霸樓塞北人
贈別獻吉

爾放金鷄別帝鄉何如李白在潯陽日暮經過燕趙客
解裘同醉酒壚傍徘徊桂樹涼颼發仰視明河秋夜長
此去梁園逢雨雪知予遙度赤城梁

送友人還吳

陽月隨陽鴈遙從塞上來北人江北望不見隴頭梅坐
下楊朱淚吟為莊舄哀聊傳數行札千里送君回

送蕭少府

矯矯雙鳬塞隴分
武夷殘雪半春雲
玉洞只愁仙隱去
洛陽花下不逢君

送唐季和謫穀城

襄陽千里道
念爾一杯辭
上馬山公醉
曹騰倒接羅
回風漂朔野
飛雪繞征旗
及此下車日
黃河水津時
江喧神女館
花發峴山祠
莫謂長沙謫
風流良在茲

送顧馬湖孔昭四首

巴東明月巴西歌兩岸梅花羌笛多一曲停橈雙淚落
猿聲三峽若為過

西上江陵北客哀遙看巴路碧崔嵬樹繞黃牛瞿峽轉
天橫劒閣蜀門開

錦水由來勝若耶蘭橈三月汎桃花巴兒見客能歌舞
蜀女明妝笑浣紗

成都酒樓高插天烏帽來游太白仙他日燕州何處覓
星槎遙挂彩雲邊

送廬陵楊二尹

何卑執戟謝京華，却愛河陽縣裏花。
不為遠師招白社，擬從勾令覓丹砂。
青天挂席浮明月，螺水迴舟勝若耶。
莫學南昌隱君子，離羣獨拂五雲車。

送友

平原蒼蒼孟冬月，行子辭燕指吳越。
淮水橋邊賣酒家，停車幾處梅花發。
羨爾侯門早拂衣，柴桑舊里角巾歸。
白酒山中新芋熟，青楓江上蟹螯肥。
閑門松竹依然在。

一曲參差醉落暉

安南歌四首送沈使君

借問炎交路若何
片帆南指廣州過
知君怕見枕榔樹
近嶺猿聲日漸多

漢關行盡忽桃源
竹樹蕭蕭鷄狗喧
銅鑼椎髻來迎槥
蠻國王孫出領幡

烏蠻灘上煙水聲
伏波廟前秋月明
夜半津人挽舟上
夷歌偏動望鄉情

皇穹覆載本無私
聖主恩波詎有涯
炎荒喜沐堯年雨
黎人重拜漢官儀

送方山人

巖子灘頭花落時
水清雲碧淨漣漪
孤舟相逐飛花去
一日看山到武夷

送盛斯徵赴長沙

昔愁越嶠千峯仄
轉入巴渝萬里賒
豈料聖恩憐賈誼
猶煩佐郡出長沙
蠻中瘴遠三湘水
江畔春逢十月花

遙聽岳陽樓上笛可能迴首憶京華

貽吳叟

鬱彼丘園叟居然松竹姿生涯隔城郭流水到茆茨乃
識堯仁大誰言靜者私中山多法酒高會及良時歲月
老將至耕桑樂在茲鹿門姻婭地從此接龐眉

寄憶一十九首

九日期登大慈恩寺閣不果寄獻吉

悵憶青蓮宇今朝黃菊開遙知遠公笑不見白衣來窈

窈人天閣崢嶸日月迴山川紛楚望城闕動秋哀峴首
羊公石淮陰戲馬臺風烟那可即逸興杳難裁強負登
樓作虛傳落帽才此時遙獨酌念爾重悠哉

唐生將卜築桃花之塢謀家無貲貽書見讓寄
此解嘲

余昔攀白日虹蜺干紫庭浮沈帝座側無人知歲星側
侍公車無所歡聊騎天馬出長安南下蒼江浮七澤還
攜謝客弄波瀾青倪中開秀廬嶽瀑布灑入千峯寒冥

冥仙氣貫南斗直欲凌身燒大丹迴裾西拂巫山浦浩
蕩歡心間雲雨歸來欲奏楚王書漢主上林方好武黃
金不遇心自吁白璧無媒翻見侮昨日結交燕少年酣
歌擊筑市中眠正逢天子失顏色奪俸經時無酒錢入
門百結鸛鷀盡笑立文君明鏡前却思舊日高陽侶黃
公酒壚何處邊天下綈袍誰不憐郤卿未具山中索何
人為買剡溪田唐伯虎真俠客十年與爾青雲交傾心
置腹無所惜擊我劒拂君纓請歌鸚鵡篇為奏朱絲繩

胡為擾擾蒼蠅之惡聲我今蹭蹬尚如此嗟爾悠悠世上名

寄華玉

去歲君為薊門客燕山雪暗秦雲白馬上相逢脫紫貂
朝回沽酒城南陌燕山此日雪雰雰祇見秦雲不見君
高天白鴈南飛盡千里相思那得聞

駕出南郊退簡邊喬二太常

齋殿鑾輿下郊宮鳳野開霜戈迎日動芝蓋拂雲來輦

道前旌直鉤陳翼騎迴甘泉枚朔侍詞賦接仙才

人日東李員外出陪郊祀

咫尺東曹彥相思隔暮雲仙源懷獨往青鳥信難聞齋
館逢人日天行望羽軍聖朝郊禮秘應待長卿文

秋日懷李郎中及邊熊二君子五首

秋興因高賦雄才憶省郎山川思不極雲樹莽蒼蒼對
酒知時變看花恨別長如何霜後鴈猶未達瀟湘

借問關中友新詩近轉多風煙興難盡搖落意如何熊

子元相得邊丞定數過誰能念離索樽酒邈山河
昨日逢京使聞渠再轉郎未妨文字癖祇益簿書忙退
食遲宮旭鳴鐘候省堂祇應騎瘦馬緩轡漫成章

每憶邊庭實才清官更閒齋心裡祀裏覃思藝林間名
致諸公早詩卑大厯還曹劉塵未遠任爾好躋攀

熊子今何在秋應奉使還威侵蕃部落旌遶漢關山沛
澤從天降三軍動地歡思君問邊略何日接清班

是時
士選

搞軍居庸闕事

載士選墓志

於武昌懷獻吉五十韻

豈是乘桴客棲棲鄂水陽
故人多放斥吾道轉淒涼
寵辱今如此沈憂不可忘
隋珠元按劍荆璞自離殃
似爾青雲器誰言世網傷
王風紛墜地冥契獨升堂
逸擬曹劉駕清聯沈謝行
列星分漢署白雪映仙郎
郎能使尚書重深揚國士
光在公勤夙夜於古準羔羊
側席遭仁聖求言渴禹湯
靡躬懷骨鯁有疏削豺狼
那信黃金鑠萋然貝錦張
孤誠迴日月萬死出風霜
直道焉辭辱庸夫

或笑狂始知天德廣曲納海流長賈誼猶投楚鄒生故
泣梁如何捐虎口忽已訝雲翔我識從偕計觀風美大
唐謬通仙籍末賜對玉墀傍食粟真為竊河清詎有常
寧論供黼黻祇爾奉趨蹌乃遘同心彥陪游古藝場夜
間堪秉燭日旰尚含香莫逆談恒劇從容寢不遑允求
諧比興端可發宮商䟽越宜宗廟華蟲傍袞裳淵衷深
禮樂文化蔚巖廊豈謂奄徂落還應厭治康雙傾泰陵
淚俱斷杞人腸赤子居猶喘蒼天意叵量河山開紫氣

符瑞轉宏綱漸厯興圖遠欣瞻帝座昌
聲靈掃烏合英德邁龍驤姬旦匡周室
相如侍武皇俄看靈霧鬱半覺老成亡
鱗逆櫻須斃乾行斷自剛內林鵠啄
吻丹闕羣浮芒逐客無寧跡窮途不裹
糧厲堦生枳棘芬餌挂鸞凰西去仍秦
苑南歸定汴鄉驚飛憐帶繳欲往嘆迷
方憶向青門別重凋季月芳幾時申契
闊繇此卜行藏太潔為身累虛名與世
妨悲歌空翫牖中路惜彷徨潛伺亨陽
復終焉履善祥達人聊麴蘖隱士且庚
桑鴻鴈紆

關塞江流極楚湘遙知懷逐侶一為奠椒漿

寄子容

芳月高堂宴辭君楚水游那知臨歲晚猶此對滄州津
煖空雲度江明霽雪浮新詩仍自惜何以慰離憂

寄獻吉

昔聞已卜扶溝廬為復還從河上居嵩雲落日迴在眼
鼉沫蛟渦愁故墟一掬那傳少陵淚經年不見茂先書
荒村豺虎眠難穩好共滄江學釣魚

閒居懷泰公

閒居習禪觀，虛獨長心苗。
萬境一澈澈，諸天何寂寥。
香飄桂子月，齋近菊花朝。
坐憶東林老，從誰過虎橋。

過喬侍郎省中因懷獻吉

東掖當年署長廊，故柳斜久辭陳子。
榻重謁謝公，衙廳事垂蛛網。
高簷噪晚鴉，風烟那可憶。
飄泊惜瑤華。

庭實久約攜酒見訪不至貽詩嘲之

九月秋風吹破廬，長安城中愁索居。
籬邊未見陶潛菊。

門外空傳長者車黃塵鬱鬱倦為客肺病時時強著書
聞道白衣將送酒荒蕪庭徑擬親除

感興懷獻吉

客舍秋風動客哀殘花秋日伴殘杯虛名久愧為身累
白眼那能免物猜落魄京華空老大旅魂江漢好歸來
山川矯首浮雲迴倚杖遙登何處臺


聞庭實上計不與悵然有懷

軺車十月四方來奈爾辭天獨未回遠在荆南淹蜀盜

祇從極北望燕臺子山涕淚秋難盡杜甫干戈老更催
牢落梅花江閣迴肯拚碁局負深杯

寄杭東卿

西湖十月烟水平梅花參差千樹明越王城畔氣應早
林逋宅邊江更清驛使章臺空寄別霜天玉笛暗沾纓
故人若有揚州興為聽春鴻白雪聲



迪功集卷三

欽定四庫全書

集部

迪功集卷

四至六

談藝錄

詳校官庶吉士^臣李如筠

中書^臣劉源溥覆勘

總校官編修^臣王燕緒

校對官中書^臣王鍾泰

謄錄監生^臣熊濂

欽定四庫全書

迪功集卷四

明 徐禎卿 撰

詠懷一十三首

太宰召補職被疾不赴齋中作

阮生嬰組紲陶子去東皋
簡性輕物務牽役使心忉
緬余沈中疴偃息悅蓬蒿
嘉薦忝章句虛劣愧時髦
雖釋負擔勤所患職司勞
案牘殊停滯觚管間時操
昨者銓衡召辭謝未云遭
絲薄懼遺僭繩憲安可逃
履貴常近

辱執要思戒撓古人亦何求抱闕竊所饗申誠周任言
寫心輸素毫將貽沮溺哂無為謝徂疇

懷往二首

昔我逢休景結交共雲翔秦客穆脩矩魯生蔚令章同
聲展言笑四座發芬芳北牖湛清酒明月出西方廣署
滅流塵蘭燈揚朱光極意連篇翰良夜殊未央歡宴豐
時豫千秋焉可忘流光一朝絕撫膺增慨慷

穴蟲測序改客鳥知時晏嚴風振中野凝霜薄飛觀褰

裳啓東戶河星出有燦耿耿不遑寐沈思汨回亂何以
終遙夕明燈且濡翰自我違之子苑藻絕流玩郢斤不
存目流俗恥堊墁塊處空堂中誰為發言粲感慨申微
詞佇立倚長嘆

雜述

緬求先民迹體德異通玄自非孔眎志所造孰無訾伊
余實闇劣秉算昧幾先言念恭人德惴惴戒重淵徒隆
守已樸罔達濟時權順正不尤物任道故樂天務光以

卷四
潔湛梅生智自全箕子狂為奴何必屈父賢未周羣物
情且復徇己偏人命幾何時金石忽以遷永言保貞素
庶明松柏堅眷念攜手益用嗣北風篇

雨霽庭藥芬郁

炎曦代暮節溽景布萋陰迎風抗高館䟽牖匝重林百
卉熙嘉月洽土重豐霖中庭始及霽芳蕤忽以森即事
寡喧垢投足類幽深朝藝植余杖時還散我襟處世常
希寂委順故怡心何必東山下考築始投簪

庚午歲九日始見二毛

常年搖落不知悲
九日今年感鬢絲
綠醕滿眼竊自壽
黃花插頭從帽敲
孤心久寄風霜外
生意長含日月私
已息塵機甘退斥
猶將筆硯愧支離

歲除貽廷實太常子容同年

歲寢物務寧時昏
羣化伏勞人慨寤
歌旅者懷出宿倚
徙窮陰沍屏居夜
氣肅游星迴素郊
嚴霜下庭木玄黥
忽變節哀株遂臨
復徂生苦鮮歡運
往悲志促前軌修

已侵後塗諒當卜嗟爾同行子及此荃蕙馥

中秋夜不見月兼邀諸太僕不至

今夜中秋月雲端空復情人間同寂寞天外獨分明桂
子飄何處邊鴻度有聲他鄉對家醞愁絕為誰傾

五月五日

怡悅經故園芳菲值良節風俗猶自存念我久離別葵
榴綴時穠蒲荷散幽冽莫謂暄景滋湘江坐鳴鵠

對月有懷

夜氣泛虛與灘聲來自遲繫舟南斗下翫月西江湄對
酒忽不御茫然空爾思

調太學博士

弱齡釋負擔浮沈游國都久知意不愜眷言返田區無
為好爵縻衣錦享我芻蕘非駢粟資何用辱鼎餉天羅
汰迭散移署廁文儒攝齊升孔堂慚非由也徒藹藹青
衿子鬱鬱含華珠上理義皇文下則述唐虞暮春西水
涯溫藻穆敷愉童冠從我游詠歌聊以娛辟雖何崇崇

崇崇麗天樞周王亮有造賢者濟弘圖小子發斯謠聊
與擊壤俱

與太學諸僚宴集

藝苑開三徑閒僚散竹林絃歌一以暇春服共相尋薄
采漪皇澤臨風歛道襟高梧無雜蔓呦鹿有佳音藉草
時傾酒披衣或鼓琴何妨慚黠也吾醉獨狂吟

題詠二十二首

偶述二絕句

聖人嘉禮在元年內使新從十道還欲遣鸞儀迎月姊
禁中宣勅會金錢

雙馬黃羈白玉羈蕃王遙貢立彤墀聖恩俄許歸天廡
內使牽來不敢騎

觀田魏二廷尉射歌

魏子手挽高麗弓氣滿兩石開青虹田郎亦自號猛手
談笑彎弓自裹肘秋風緊馬古原下合耦翩翩習步射
眼中何有百步的彊幹慣使千年柘共驚二子手法利

突如流星中如樹側身仰視秋雲開飛鳥顧之不敢度
壯哉二子氣如虹左揮右霍真兩雄燕山秋高太白動
寒日獵獵吹邊風前時出軍大同壘紅纓白馬多乳子
柔絲斗弩不解持吹竽之濫誠可嗤彼乳子者何足道
可惜王師直為老吁嗟田魏二子真雄才高壇大纛何
有哉

月

故園今夜月迢遞向人明只自懸清漢那知隔鳳城氣

兼風露發光逼曙烏驚何事江山外能催白髮生

酬李員外贈古鏡歌

關西故人惜我別贈我古鏡光如雪感君意氣特相許
爰披肝膽照清徹盪日摩空恍虛暎與室青瞳閃宵晰
妙質精凝水土深丹煙碧霧生華纈圓銘髣髴不可讀
蛭屈蟲蠕細糾結腰間錦囊故所佩請脫繩絲置局鐻
當令明月入我懷精光夜夜隨虹霓故人卓犖信才傑
蒼銚炯炯宜相劣嗟予蓬穢何所似對此不覺心內熱

湘江溟洞入無滓衡嶽凌空鬱岑巖山行應使魑魅逃
水宿能令蛟怪滅古物由來孕神秀靈光不讓三尺鐵
憐君至寶不自惜何以報之嗟菲蔑護藏但使鏡莫缺
與君交情世不絕

月

落日桃源口迢迢望楚邦煙霏靜夜色棹響繞空江看
月生西浦穿雲度北窗高樓有羈羽照影不成雙

江夏題王守城南精舍

林步不覺遠溪流隨興長悠然深竹裏獨往綠蘿莊山
色佳南郭平疇連北堂野人來荷鋤蠶月百草芳寤愜
白雲賞載謠叢桂章垂楊足池鯉閒牖有壺觴念此牽
情性何勞緇素裳

日蝕

王春啓元祚陽德麗方升光華奄薄蝕陰厲故相乘精
稷信交濫貞悔邈何徵千官祇對越聖席眇虛憑周詩
舊陳戒麟編薄示懲昭象著龜合殷憂茲日承微臣限

江漢延佇意何勝

觀鴛鴦贈客

網羅豈孤避志命願雙沈唯應合歡被為刺白頭吟

女睟日

去年生汝日吾病始人扶風俗傳針縷家貧亦履襦避寒猶在襁愛母未能呼女性從遲鈍無教勝丈夫

觀唐生寄贈子容洞庭山圖因求作廬山障子

丹巒氤氲拂空起素練平鋪洞庭水迴谿笑指毛公家

忘却滄江幾千里我隔廬峯夢紫煙嘗騎白鹿上青天
煩君貌出仙人障西寄長安向日邊

沅溪潘進士在長安逆旅中見庭下山丹花詰
其主云是沅中移來感而賦詩命予嗣響

故苑花空發他鄉鶯自啼主人孤館裏斜日楚雲西

曹別駕畫山鷄歌

東昌曹侯擅丹青天機觸手隨風雲戲貌山鷄歛出草
錦毛霞翅回繽紛蹙距昂頭執欲移似猜羅網立還遲

家鷄突見甘一決對此凝然仍自疑

題潘進士贈謝昌邑雪山圖

誰謂咫尺勢宛如觀九疑狂風吹白雪片片落天池雲
氣遶半壁煙光昏四維髣髴湘君廟如聞猿狖悲颯沓
凌冬樹點綴有餘姿楚客善毫素游燕人未知北窗遇
陶令大醉雪寒時凍灑丹青筆長歌歸去詞它日看圖
畫難忘剡水思

寄題瀘州韓道人霞外山居

霞嶺新刊處由來古洞天仙人煉金液蛻此百餘年其
事竟莫述丹書空秘玄忽有飛霞子誅茅卧紫烟虛府
激物滓靈根歸自然蒼龍守神室白虎伏階前遊心碧
海外高詠閨風巔孤流振往派絕理悟真詮余讀相如
賦飄飄竊慕焉欲跨青牛去思食金屑泉至道豈虛想
銘心非薄緣瑤池應有會瓊笈願相傳

題唐氏園池

堂上琴書暇名園愜宴游綠陰交樹石白水散田疇林

步常驚鳥沙眠且狎鷗開軒桑柘接當徑草花幽野老
時相過村醪擬共酬陶然菊松下乘興足淹留

鳳凰山園雜詠

鳳鳴亭

鳳鳥期不來瑤華幾銷歇唯有山中人吹簫弄明月

月軒

石室月已滿青林人未眠向月步溪水白雲遙在天

香圃

露華散平林月明在寥廓時有天風來冷然桂花落

奕臺

仙人好博奕時下綠雲中一片蒼苔石落花長自紅

彩雲巖

出巖初嫋嫋映日乍暉暉倏若陽臺女隨風化雨飛

十六夜月

乍滿虧俄及緣明晦易侵不愁妨玉兔常恐近浮陰白露丹楓急清光紫闥深如何鴻鴈意噉噉有驚音

哀挽三首

瞻文溫州畫像

浮生此世隔過位恍然疑直訝風雲動俄驚泰華隨巖
廊不可起英爽儼如遺白首通羣略雄才沮一麾徒教
涕泗闊共惜羽毛遲堂几蕭蕭在丹青漠漠垂典刑歸
此老江海寄餘思有忝吹噓力無忘沃酹辭風煙久搖
落魂氣復何之躑躅庭除下伸衷托短詩

挽劉大夫瀚

耆舊日云瘁斯人今則亡高門自喬木清望惜吾徒久
厭揮金譽遙傳奉使圖勤勞中外洽醇介始終孚厯職
參廷尉紆金列大夫俄聞去秦隴早已憶江鱸自恥為
名累非關索杖扶角巾聊宴樂園徑忽榛蕪令子中朝
貴青雲奮翼俱蒼茫函問遠浩蕩國恩殊紫璽加封舊
黃金賜葬逾死生三品遇伉儷百年須走送連童穉飛
旌出市衢夜臺渾寂寞霜雪正膏塗永與交親隔何言
歲月徂野風吹客淚腸斷更踟躕

亡女旅櫬南泉寺

月滿花宮不見人
殤魂獨宿網流塵
那因得借金輪力
白玉光中現爾身

迪功集卷四